

*Evropski Reporter*, 12. septembar 2009. godine

## SEKRETARIJAT SAVJETA ZA REGIONALNU SARADNJU U SARAJEVU OKUPIO STRUČNJAKE RADI PRIPREME STRATEGIJE ISTRAŽIVANJA I RAZVOJA ZAPADNOG BALKANA

# Udruženim znanjem prema EU



**Podgorica** - Stručnjaci iz ministarstava nauke zemalja članica Savjeta za regionalnu saradnju (RCC) Jugoistočne Evrope, uključujući Albaniju, Bosnu i Hercegovinu, Hrvatsku, Crnu Goru, Srbiju, Makedoniju i Kosovo, predstavnici Evropske komisije i članovi naučnih institucija iz regiona, počeli su da pripremaju umrežavanje naučnog i privrednog sektora.

Podržani predstavnicima Svjetske banke, na sastanku održanom početkom ove sedmice u Sarajevu, saglasili su se u ocjeni da je regionalno djelovanje najefektniji, najekonomičniji i najpraktičniji model djelovanja na putu pridruživanja zemalja Zapadnog Balkana Evropskoj uniji.

Cilj Regionalne strategije istraživanja i razvoja zapadnog Balkana je povećanje prenosa znanja kroz jačanje mreža i kapaciteta istraživača i naučnika jugoistočne Evrope i poboljšanje saradnje naučnih, istraživačkih i obrazovnih zajednica sa poslovnim sektorom. Cilje je i da se u konkurentnim sektorima uspostave prekogranični regionalni klasteri.

“Sastanak je bio radni nastavak ministarske konferencije koju su 24. aprila 2009. godine u Sarajevu organizovali Sekretarijat RCC-a i Češka Republika, a za cilj je imao ocjenu trenutog statusa i budućih faza projekta izrade regionalne strategije. U skladu sa Zajedničkom izjavom, koja je usvojena na ministarskoj konferenciji, uspostavljeno je koordinaciono tijelo projekta koje će biti zaduženo za izradu strategije, a imena članova ovog tijela, predstavnika pojedinačnih zemalja, članica RCC-a, biće poznata do kraja naredne sedmice”, kazao je za *Evropski Reporter* **Mladen Dragašević**, šef Odjelenja za unapređenje ljudskih resursa u Sekretarijatu Savjeta za regionalnu saradnju

Projekat Regionalne strategije za istraživanje i razvoj za Zapadni Balkan je, u skladu sa Lisabonskom agendom Evropske unije, nastao u cilju daljeg unaprijeđenja istraživanja, inovacija i obrazovanja, ali i njihove efikasnije povezanosti.

## Put do mreže naučnika i privrednika

Plan je da se poveća intezitet razmjene znanja putem jačanja mreža istraživača i naučnika na zapadnom Balkanu. Strategijom su obuhvaćene aktivnosti kojima će se stvoriti uslovi za jačanje istraživačkih kapaciteta mladih naučnika, te unaprijediti komunikacija naučno-istraživačkog i obrazovnog društva sa poslovnim sektorom.



Dragašević kaže da je konkretna ideja kojoj RCC teži da se zajedničkim naporima istražuje u različitim oblastima, od zaštite okoline do unaprijeđenja raznih grana industrije.

Ministri zaduženi za nauku i istraživanje u članicama Savjeta za regionalnu saradnju (RCC) sa Zapadnog Balkana su u Sarajevu, krajem aprila ove godine, usvojili Zajedničku izjavu kojom su izrazili snažnu i jednoglasnu podršku daljem razvoju projekta.

Na toj osnovi, uz pomoć predsjedništva Savjeta Evropske unije, RCC je koordinisao aktivnosti na izradi projekta Regionalne strategije. U toku je uspostavljanje koordinacionog tijela.

“Ovo tijelo će raditi na daljem unaprijeđenju projekta i organizovati pripremne aktivnosti za njegovu efikasnu realizaciju. Nacrt projekta će do sredine mjeseca biti dostavljen Evropskoj komisiji. Očekuje se da bi procedure u nadležnim organima Evropske komisije o pružanju finansijske podrške projektu trebale biti okončane do aprila naredne godine”, ocjenjuje Dragašević.

On je kazao da su modaliteti finansiranja projekta vrijednog 1,5 miliona eura, takođe bili predmet sastanka u Sarajevu.

“Evropska komisija će razmatrati mogućnost finansiranja projekta Regionalne strategije za istraživanje i razvoj za Zapadni Balkan iz fondova Instrumenta prepristupne pomoći (IPA) EU, koji je namijenjen upravo razvojnim multilateralnim projektima država budućih članica EU.

Pojedinačne članice RCC apliciraće u budućnosti za projekte pomoći i saradnje u oblasti obrazovanja i naučno-istraživačkog rada, a jedan od glavnih preduslova da RCC pruži podršku određenom projektu je što značajnije učešće stručnjaka iz regiona u pripremi i realizaciji projekta, u saradnji sa specijalizovanim agencijama i službama EU.

“Naše je uvjerenje da aktivnim pristupom i učešćem u izradi i primjeni konkretnih regionalnih

projekata, eksperti i službenici zemalja regiona jačaju vlastite kapacitete, a time ujedno i kapacitete institucija i država iz kojih dolaze. Upravo je to jedan od glavnih zadataka Odjeljenja za unapređenje ljudskih resursa RCC Sekretarijata. Projekat Regionalne strategije za istraživanje i razvoj za zapadni Balkan je odličan primjer sprovođenja takve politike, s obzirom da su izradi nacrti aktivno doprinijeli i, slobodno mogu reći, najveći dio posla obavili ljudi iz nadležnih institucija i instituta država regiona”, ističe Dragašević.

### **Preko fragmenata do cjeline**

Kapaciteti zemalja zapadnog Balkana su mali i fragmentirani, pa je njihova saradnja od presudnog značaja. Individualni nastupi na tržištu Evropske unije, kako se procjenjuje u RCC-u, ne bi dali pozitivan rezultat.

"Mi smo male, siromašne zemlje i moramo uhvatiti korak. Ulaganjima i zajedničkim radom na istraživanjima i razvoju smatramo da možemo bitno unaprijediti ekonomski i socijalni razvoj u regionu. To je glavni cilj pokretanja ovog projekta“, rekla je zamjenica generalnog sekretara RCC-a **Jelica Minić**.

Ona napominje da regionalna saradnja ima višestruk značaj i da je osnovna namjera da se na ovaj način, u matičnim zemljama, zadrži mladi perspektivni kadar kojem će biti otvorena vrata evropskog istraživačkog prostora.

**Novinar, Vanja Lazarevski**